

Gweinidog yn Cymeradwyo Cynigion Ad-drefnu Ysgolion yn Abergwaun a Thyddewi



Mae Kirsty Williams AC, Ysgrifennydd y Cabinet dros Addysg, wedi cymeradwyo cynigion i ad-drefnu addysg yn Abergwaun a Thyddewi.

Mae cymeradwyaeth y Gweinidog yn dilyn ymgynghori â disgyblion, rhieni, staff, llywodraethwyr ac amrywiol ymgynghoreion eraill yn ystod hydref 2015 a chyhoeddi Rhybudd Statudol ym mis Tachwedd 2015.

Mae cymeradwyaeth y Gweinidog yn paratoi'r ffordd ar gyfer y canlynol:

- Cau Ysgol Dewi Sant, Ysgol Bro Dewi ac Ysgol Gynradd Solfach ar 31ain Awst 2018;
- Sefydlu ysgol newydd 3-16 WG yr Eglwys yng Nghymru yn Nhyddewi mewn grym o 1af Medi 2018, gan ddefnyddio safleoedd yr ysgolion cyfansoddol;
- Gostwng ystod oedran Ysgol Bro Gwaun i 11-16 mewn grym o 1af Medi 2018;
- Sefydlu Canolfan Adnoddau Dysgu newydd ar gyfer disgyblion gydag anghenion dysgu cymhleth yn Ysgol Bro Gwaun;
- Sefydlu canolfan chweched dosbarth newydd fel rhan o gydweithio ffurfiol rhwng y Cyngor Sir a Choleg Sir Benfro ar gyfer disgyblion ôl-16 yr ysgolion uchod.

Yn gyfochrog â'r uchod, bydd gwaith yn dechrau'n fuan ar godi adeiladau newydd yn Ysgol Bro Gwaun ac mae gwaith ar y gweill i ddatblygu'r patrwm 3-16 ar draws safleoedd y tair ysgol yn ardal Tyddewi fel rhan o Raglen Ysgolion yr 21ain Ganrif y Cyngor.

Ar gyfer dysgwyr ôl-16 o Ysgol Dewi Sant ac Ysgol Bro Gwaun, mae gwaith ar y gweill eisoes ar Ganolfan Ddysgu Uwch yng Ngholeg Sir Benfro. Wedi'i ariannu gan Goleg Sir Benfro a Llywodraeth Cymru, bydd yr adeilad newydd £6.6m yn agor ym mis Medi 2017 a bydd yn cefnogi a hyrwyddo addysgu ysbrydoledig mewn amgylcheddau dysgu sy'n arwain y sector.

Meddai'r Cynghorydd David Lloyd, Cadeirydd Llywodraethwyr Ysgol Dewi Sant a'r Aelod Cabinet dros Addysg: "Mae cymeradwyo'r cynigion ar gyfer Ysgol Bro Gwaun, darpariaeth addysg yn Nhyddewi a'r Ganolfan Safon Uwch newydd yn Hwlfordd gan Kirsty Williams, y gweinidog newydd, ar ôl deg mis o archwilio manwl yn arwydd o ba mor dda y derbyniwyd cynlluniau gofalus yr Awdurdod.

"Mae'n benderfyniad o bwys, sy'n rhoi cryn obaith at ddyfodol darpariaeth addysgol yn y sir gan gynnig gwir bosibilrwydd gwella canlyniadau ein disgyblion i fod ymhlith yr uchaf yng Nghymru. Rwy'n llawn cyffro ynghylch yr her o'n blaenau. Rydym ar y ffordd heb unrhyw amheuaeth"

Meddai Sharron Lusher, Prifathrawes y Coleg: "Mae'r hyn a gynlluniwn yn cynrychioli buddsoddiad anferth yn addysg Sir Benfro. Bydd ein Canolfan Ddysgu Uwch newydd, ochr yn ochr â mwy o welliannau

i gampws y Coleg, yn elwa ein holl ddysgwyr ac yn adeiladu ar ein hymrwymiad i roi'r cyfleoedd addysgol gorau oll i bobl ifanc Sir Benfro."

Meddai'r Cynghorydd Jamie Adams, Arweinydd y Cyngor: "Mae penderfyniad y Gweinidog yn garreg filltir bwysig wrth ad-drefnu darpariaeth addysg uwchradd yn Sir Benfro. Gwnaeth y Cyngor a'r cymunedau lleol achos cryf ar sail tystiolaeth dros newid a chaiff yr effaith ei theimlo gan holl ddysgwyr yn ardaloedd Abergwaun a Thyddewi. Mae'r penderfyniad yn sicrhau y bydd darpariaeth addysg uwchradd yn cael ei chynnal, er bod hynny ar wahanol batrwm.

"Mae'r cynigion hyn wedi wynebu llawer o heriau yn ystod y 12 mis diwethaf fwy neu lai, ond mae penderfyniad y Gweinidog yn cyfiawnhau dymuniad y Cyngor i newid ffurf darpariaeth yn Abergwaun a Thyddewi er gwell a chyfraniad y cymunedau wrth ddatblygu patrwm mewn partneriaeth â'r Cyngor sydd wedi ateb yr heriau a sicrhau dyfodol i'r genhedlaeth nesaf."